

NO. SOALAN: 38

**PEMBERITAHUAN PERTANYAAN BAGI JAWAB LISAN
DEWAN RAKYAT**

PERTANYAAN : LISAN

**DARIPADA : TUAN N. SURENDRAN A/L K. NAGARAJAN
[PADANG SERAI]**

TARIKH : 08 NOVEMBER 2017

RUJUKAN : 10315

SOALAN :

Tuan N. Surendran A/L K. Nagarajan [Padang Serai] minta MENTERI DALAM NEGERI menyatakan sama ada Kementerian bercadang untuk menghentikan amalan oleh SPRM dan PDRM yang membawa tahanan reman (yang belum disabit hukuman) ke Mahkamah memakai baju lokap masing-masing berwarna jingga dan ungu.

JAWAPAN :

Tuan Yang di-Pertua,

Untuk makluman Ahli Yang Berhormat, pemakaian baju khas untuk tahanan semasa dalam lokap polis telah direka bentuk bagi memastikan orang tahanan diberikan pakaian sesuai mengikut piawaian ditetapkan, tidak mendatangkan kemudaratan kepada tahanan itu sendiri atau boleh mendatangkan bahaya kepada tahanan yang lain semasa dalam kurungan.

Kuasa untuk menentukan jenis dan warna pakaian diputuskan mengikut Seksyen 97 Akta Polis yang membenarkan Ketua Polis Negara mengeluarkan perintah-perintah pentadbiran bernama “perintah tetap” yang tidak berlawanan dengan akta ini untuk kawalan dan arahan dan maklumat am pasukan dan semua badan yang ditubuhkan atau didirikan untuk menjalankan tugas-tugas polis di bawah akta ini. Selaras dengan kehendak ini, Arahan Ketua Polis Negara A118 dan Arahan Pentadbiran Bilangan 16 bertarikh 2 September 2009 telah dikeluarkan bagi memperincikan pengurusan lokap dan pakaian semasa dalam tahanan.

Pemakaian baju khas tersebut juga dapat membantu polis dalam urusan orang tahanan seperti berikut:

- i) menghindarkan niat pesalah untuk melarikan diri semasa dibawa ke Mahkamah bagi tujuan mendapatkan reman. Dengan berpakaian sedemikian agak sukar bagi tahanan melarikan diri kerana masyarakat boleh mengenali mereka sebagai orang tahanan.
- ii) memudahkan pengecaman dibuat terhadap jenis kesalahan yang dilakukan oleh orang tahanan berdasarkan warna baju yang dipakai. Bagi kes yang berprofil tinggi dan merbahaya, kawalan yang sewajarnya boleh diberikan semasa dalam tahanan atau semasa dibawa ke Mahkamah.
- iii) mengelakkan daripada berlaku kes yang tidak diingini dalam tahanan seperti kes membunuh diri, diguna sebagai senjata dalam percaduhan atau cubaan melepaskan diri.

Pakaian yang dipakai oleh orang tahanan tidak menggambarkan bahawa orang tahanan telah bersalah tapi sebagai urusan pentadbiran pihak polis sahaja. Andaian tentang pemakaian tersebut memberi gambaran orang tersebut seolah-olah telah bersalah hanya persepsi yang sengaja digembar-gemburkan oleh pihak yang mempunyai agenda tersendiri.

**MESYUARAT KETIGA, PENGGAL KELIMA,
PARLIMEN KETIGA BELAS
PEMBERITAHUAN PERTANYAAN
DEWAN RAKYAT MALAYSIA**

PERTANYAAN : JAWAB LISAN

DARIPADA : TUAN ANYI NGAU [BARAM]

TARIKH : 8 NOVEMBER 2017 (RABU)

SOALAN : 39

minta **MENTERI KEMAJUAN LUAR BANDAR DAN WILAYAH** menyatakan status pelaksanaan projek menaik taraf jalan balak bernilai RM300 juta yang diumumkan YAB Perdana Menteri untuk kawasan Parlimen Baram pada Jun 2013. Sila nyatakan lokasi, jarak dan taraf jalan yang telah, sedang dan akan dilaksanakan ikut tahun/fasa.

JAWAPAN :

Tuan Yang Di-Pertua,

Untuk makluman Yang Berhormat, projek menaiktaraf bekas jalan-jalan balak di negeri Sarawak dengan peruntukan berjumlah RM300 juta sebagaimana yang telah diumumkan oleh YAB Perdana Menteri pada Jun 2013 telah dan sedang dilaksanakan melalui 4 fasa. Peruntukan ini melibatkan pelaksanaan projek bukan sahaja di Parlimen Baram, malah ianya melibatkan beberapa Bahagian di seluruh negeri Sarawak. Peruntukan berjumlah RM300 juta ini telah dinilai dan disemak semula oleh pihak Kementerian dan Kerajaan Negeri Sarawak dan telah dipersetujui untuk ditambah menjadikan peruntukan keseluruhan pelaksanaan Projek Menaiktaraf Bekas Jalan-Jalan Balak di Negeri Sarawak berjumlah RM385.0 juta.

Butiran pelaksanaan Projek Menaiktraf Bekas Jalan-Jalan Balak mengikut fasa adalah seperti berikut:

- i. **Fasa 1:** Melibatkan Bahagian Miri dengan peruntukan berjumlah RM64.0 juta dan jalan sepanjang 142km. Projek telah

25
disediakan secara berperingkat pada tahun 2014 dan 2015;

- ii. **Fasa 2** : Melibatkan Bahagian Miri, Limbang, Bintulu, dan Betong dengan peruntukan berjumlah RM70.0 juta dan jalan sepanjang 87.1km. Kesemua Bahagian telah disediakan secara berperingkat pada tahun 2015 dan 2016;
- iii. **Fasa 3** : Melibatkan Bahagian Miri dengan peruntukan berjumlah RM52.0 juta dan jalan sepanjang 108.84km. Projek baru sahaja disediakan pada Ogos 2017; dan
- iv. **Fasa 4** : Melibatkan Bahagian Miri, Kapit, Betong, Sarikei, Sri Aman, Sibu dan Bintulu dengan peruntukan berjumlah RM199.0 juta dan jalan sepanjang 374.95km. Pada masa ini rekabentuk projek telah disediakan dan sedia untuk dirunding harga selewat-lewatnya sebelum Disember 2017.

SOALAN (40)**PEMBERITAHUAN PERTANYAAN
DEWAN RAKYAT, PARLIMEN MALAYSIA**

PERTANYAAN : LISAN

TARIKH : 8 NOVEMBER 2017
[RABU]

DARIPADA : YB DATO' DR. HAJI NOOR AZMI BIN GHAZALI
[BAGAN SERAI]

SOALAN :

YB DATO' DR. HAJI NOOR AZMI BIN GHAZALI [BAGAN SERAI]
minta PERDANA MENTERI menyatakan apakah langkah-langkah Kerajaan bagi memastikan manfaat pertumbuhan dapat dirasai oleh semua peringkat masyarakat dan kos sara hidup meningkat secara stabil seiring dengan kenaikan pendapatan. Bagaimanakah manfaat ini dapat disebarluaskan secara meluas ke seluruh wilayah.

JAWAPAN :-

Tuan Yang di-Pertua,

Untuk makluman Ahli Yang Berhormat, dalam Rancangan Malaysia Kesebelas (RMKe-11), pelbagai usaha pembangunan secara inklusif diteruskan bagi memastikan manfaat pertumbuhan dapat dirasai oleh semua peringkat masyarakat. Secara khususnya, program dan inisiatif yang diambil oleh Kerajaan dalam usaha untuk meningkatkan kualiti hidup rakyat, adalah dengan tujuan supaya rakyat dapat menyerap sebahagian daripada kos pembangunan yang terlibat. Dalam hal ini, pelbagai langkah diambil dalam setiap sektor atau bidang di antaranya adalah;

Pertama; **Meningkatkan penyediaan Rumah Mampu Milik kepada isi rumah B40 dengan pinjaman pada kadar faedah istimewa dengan tempoh moratorium untuk menjual harta tanah selama 10 tahun melalui Program Perumahan Rakyat oleh Kementerian Kesejahteraan Bandar, Perumahan dan Kerajaan Tempatan, Perbadanan PR1MA Malaysia, Syarikat Perumahan Negara Berhad (SPNB) dan Kerajaan negeri.**

Kedua; Meningkatkan perkhidmatan penjagaan kesihatan awam dan akses kepada kemudahan tersebut. Dalam hal ini, Kerajaan akan menggalakkan penyertaan yang lebih aktif penyedia perkhidmatan penjagaan kesihatan swasta dan NGO untuk menyediakan pusat kemudahan khusus seperti dialisis, pemulihan dan makmal ujian perubatan di bandar. Kemudahan oleh pihak swasta ini akan menjadi pelengkap kepada perkhidmatan penjagaan kesihatan sedia ada yang diberi oleh Kerajaan. Di luar bandar, lebih banyak klinik desa akan dibina untuk meningkatkan akses kepada perkhidmatan penjagaan kesihatan asas.

Ketiga; Memperkenalkan Sistem Jaringan Keselamatan Sosial (SSN) yang bersepadu dan komprehensif. Satu badan penyelarasan peringkat tertinggi iaitu Majlis Perlindungan Sosial Negara telah ditubuhkan pada 28 Oktober 2016 untuk menyediakan panduan dasar bagi keseluruhan sistem perlindungan sosial, merangka strategi perlindungan sosial negara untuk merealisasikan program perlindungan sosial dan menyelaras pelaksanaan program-program berkaitan. Majlis Perlindungan Sosial Negara dibantu oleh Jawatankuasa Teknikal serta Kumpulan Kerja bagi meneliti dan memperincikan isu-isu berkaitan perlindungan sosial.

Dalam masa yang sama, bantuan dan kemudahan peningkatan keupayaan dan kemahiran juga disediakan termasuklah;

Pertama; **Meningkatkan produktiviti dengan menggalakkan penggunaan teknologi moden**, di mana golongan berpendapatan rendah digalakkan menggunakan peralatan moden bagi meningkatkan produktiviti seterusnya meningkatkan pendapatan.

Kedua; **Meningkatkan sokongan bersepadu kepada usahawan** dengan kerjasama agensi dalam menyediakan program sokongan keusahawanan kepada usahawan mikro, kecil dan sederhana di bandar dan luar bandar seperti SME Corp, TEKUN Nasional dan Amanah Ikhtiar Malaysia (AIM). Ini adalah bagi mewujudkan usahawan yang berdaya tahan (*sustainable*).

Ketiga; **Membangunkan perusahaan berdasarkan komuniti dan sosial** yang merupakan pendekatan sistematik berdasarkan model koperasi bagi menjalankan aktiviti seperti pusat asuhan dan jagaan kanak-kanak dan pusat tuisyen. Usaha ini adalah bagi memperkasa kepimpinan tempatan.

Keempat; **Menggalakkan pelaburan di kawasan majoriti golongan rendah dan sederhana dengan penyertaan syarikat multinasional (MNC) dan syarikat besar tempatan (GLC) untuk memberi galakan melalui penyediaan Dana Mudahcara.**

Selain daripada itu, pelbagai inisiatif khusus juga telah dilaksanakan oleh Kerajaan dengan melihat dari pelbagai perspektif utama dalam usaha untuk menangani kenaikan kos sara hidup dan di antaranya termasuklah;

Pertama: **Memperkuuh pemantauan dan penguatkuasaan peraturan berkaitan kawalan harga** di mana usaha berterusan untuk mengekang kenaikan harga yang tidak munasabah terutamanya ke atas keperluan asas serta barang kawalan.

Kedua: **Kementerian Kewangan sentiasa mengkaji dan menimbang semula beberapa perkara seperti had pelepasan cukai dinaikan dan ditambah perkara-perkara yang boleh dikecualikan daripada cukai kepada golongan peringkat pertengahan (M40), pelepasan cukai bagi kos penjagaan anak ke atas ibu bapa dan penstrukturkan semula cukai pendapatan ke atas golongan berpendapatan sederhana, dan**

Ketiga: Meningkatkan program pengurusan kewangan dan hutang di mana tahap literasi dan keupayaan pengurusan kewangan diperkuuh sepanjang tahap kehidupan untuk memupuk pengurusan kewangan berhemat dari usia muda serta bagi mengelakkan kadar keberhutangan yang tinggi dalam kalangan isi rumah B40.

Dengan penglibatan bersepadu semua pihak Kerajaan dan swasta, inisiatif-inisiatif ini dapat dimanfaatkan sepenuhnya oleh rakyat di semua peringkat.

Sekian, terima kasih.

8 November 2017